

UNIVERZITET  
ECONOMIA  
2028 17  
13.10.2014.



## ISPUNJENA OBEĆANJA (...ili zašto izbori trebaju biti svakih šest mjeseci)

**O**vih dana sam, kao i svi vi, bombardovana pozivima, porukama, lijepim obećanjima da ću naredne četiri godine živjeti u zemlji posla, pravde, izobilja samo pod uvjetom da svoj glas dam ovoj ili onoj stranci. Do mene još nisu stigli paketi sa kafom i šećerom, uljem i brašnom, a nisam dobila ni one humanitarne (pardon, higijenske) uloške neprijatnog mirisa. No, zato sam dobila još 20 kilometara autoceste na *Koridoru Vc*, tunel "1. mart", *Sarajevsku zaobilaznicu*, još par kredita koje je podigla država da bi nam svima, jelte, bilo bolje.

U mojoj mahali nisu obnovili asfalt ima 10 godina (to valjda čuvaju za općinske izbore), ali sam se zato nagledala scena asfaltiranja seoskih, magistralnih puteva i sl. Neki dan sam slučajno prolazila kroz selo Ljubunčić kod Livna koje, vjerovali ili ne, ima trotoar. Stvarno se ne bih čudila da susjedna sela, također, imaju trotoar, na kojemu se po boji asfalta vidi da je nedavno napravljen. Raspitam se kod mještana i saznam da je trotoar poklon njihovog seljanina koji je ujedno i direktor javne kompanije koja se bavi cestama, magistralnim i regionalnim.

Čestitam mještanima Ljubunčića, oni su dobili nešto trajne vrijednosti, a dotični podršku većeg broja svojih sumještana za neki novi mandat i funkciju. Prvobitna razmjena iliti trampa, ja vama asfaltirani trotoar, vi meni glasove. Sigurno je da još ima sela i zaselaka koji su dobili asfalt sada uoči izbora u zamjenu za glasove koje će dati kandidatima na kantonalnim, entitetskim ili državnim listama.

Čujem i da su profesori na fakultetima u Sarajevu dobili dvije plaće u septembru (*Vlada KS* im dođe još tri), poljoprivrednici diljem BiH poticaje (koji mimo predizborne kampanje redovno kasne), doktori u pojedinim kantonima čak i regrese, policajci zimske uniforme u jesen (obično ih dobiju krajem proljeća ili početkom ljeta naredne godine)...

I, svima dobro... Pa kada je već predizborno vrijeme jedino u kojem možemo računati da ćemo biti u fokusu naših političkih lidera ili kandidata, u kojem brinu o nama, daruju nas paketima, asfaltima, kilometrima autoceste, poticajima za poljoprivredu, redovnim plaćama, regresima, opremom, razmišljam nešto kako bi nam bilo dobro da su izbori svakih šest mjeseci... Zamislite uživanja, svi problemi se promptno rješavaju, ceste asfaltiraju, poticaji isplaćuju, ne kasne plaće, regresi. Dobro nama, a i njima.

I zato sam za izbore svakih šest mjeseci... Jer, znam nas... Već 13. oktobra političare više neće biti briga za nas, jer počinje odsudna bitka... Za fotelje... **B**

*Aida Delić,*  
glavna i odgovorna urednica